



**PRIMEIRO
MINISTRO**

**DISKURSU
SUA EXELÉNSIA PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA BIBAN SORUMUTU DA-XVII MINISTRU DEFEZA CPLP**

**Díli
Loron 19 fulan Maiu tinan 2016**



Palácio do Governo,
Avenida Presidente Nicolau Lobato,
Díli, Timor-Leste

Exelénsias

Señor Ministru Defeza Repúblika Demokrátika Timor-Leste
Señores Ministrus CPLP, no representante sira hotu
Señor Sekretáriu Ezekutivu CPLP
Kolega Membru Governu sira hotu
Xefe Estadu-Maior-General F-FDTL
Señor Komandante Geral PNTL
Señor Vice—Xefe Estadu-Maior-General F-FDTL
Señor Xefe Estadu-Maior F-FDTL

Ex.mus Señora no Señor sira

Diretore Polítika Defeza Nasional no Diretor Sentru Análize Estratéjika CPLP
Membru Delegasaun Estadu-Membru sira hotu no Sekretariadu Ezekutivu CPLP
Reprezentante Observadores Assosiadus CPLP nian
Reprezentante Korpu Diplomátiku no Sosiedade Sivil

Señora no Señore sira hotu,

Molak atu hahú, hau hakarak hato’o hau nia “boas-vindas”, no mós agradese ba ami nia Ministru Defeza, hodi hato’o katak, ho ksolok boot maka ohin hau bele hamriik iha enkontru paizes maun alin sira ne’ebé koalia lian portugues.

Hakarak hato’o mós lian fuan espesial ida ba Señor Ministro Defesa no Tasi São Tomé e Príncipe, Dr. Carlos Olímpio Stock, ba servisu hotu ne’ebé nia hala’o iha tempu ne’ebé assume kargu hanesan Defeza Comunidade Países ne’ebé koalia Lian Portugues.

Hakarak fó mós hau nia benvindo ba Ministru Defeza presente iha ne’e no Xefe Delegasaun representa Ministru sira ne’ebé maka labela komparece, no halo votu atu estabelese hikas fila fali situaun normal no estabilidade duradoura iha sira nia rain, liu husi dalan diálogo, kaer hikas fila fali lia fuan husi Señor Ministro Defeza.

Reuniaun Ministru Defesa sira nian hanesan Forum aas ne’ebé ita halibur malu hodi reflète kona ba kestaun Defesa sira nian, tau hamutuk esperiénsia no visaun sira hodi fortalese bainhira hanesan país ida no mós ho hanoin katak ita ida deit iha ita nia Komunidade, hanesan ita nian rasik ka komun ba ita hotu, no mós hanesan paiz maun alin.

Polítika defesa Timor-Leste nian hala’o liu husi sistema seguransa koperativa ne’ebé liga ho interdependénsia ekonómika, ho hanoin atu hari’i kuadru normativu komun ida hodi reforsa konfiansa entre Estadu sira hotu. Ho aumenta kooperasaun entre Estadu iha matéria seguransa nian, iha nível bilateral nune mós multilateral, ne’ebé reflète ona iha dékada rua liu ba ne’e.

Iha mundo globalizadu ne’ebé ita moris dadaun ne’e, ita se la hases an husi paradigma foun ida ne’e. Oihin loron ita hala’o sistema organizaun konjunto husi Estadu sira hotu, iha ligaaun ba malu liu husi instrumento no mekanismu formal no informal interdependénsia, karateriza husi instrumento institusionalizasaun relasaun entre atores estaduais, no mós naun-estaduais, no desnacionalizasaun orientasaun polítika sira nian, liu liu polítika seguransa nian.

Iha paradigma ida ne’e, objetivu ami nia Defeza no Seguransa iha kompromisu boot hodi kontribui ba paz, seguransa, estabilidade rejional no internasional, hodi apoiu polítika esterna

Estadu nian no hodi reforsa relasaun ho ami nia parseiru previlijiadu no nasaun amigu sira, hanesa CPLP nian. (sira)

Hanoin mós katak, komponente Defeza CPLP nian fundamental tebes hodi bele kumpri objetivu no prinsipi orientador sira ne'ebé ita nia Komunidade hala'o tuir, bainhira estabesele tiha ona ho hanoin atu konsolida lasu amizade, valor no interese komun entre paiz lusófonu sira, hanesan hodi promove sezenvolvimento no kontribui ba ambiente internasional ne'ebé ekilibriu no pasífiku liu tan.

Nune'e, objetivu sira hotu ne'ebé ita komunga sai hanesan dimensaun foun ida ba projesaun internasional paiz CPLP sira nian hotu. Ita hotu hatene katak, hamutuk ita sei forte liu hanesan ita hanoin tiha ona iha nível aas ita nia Komunidade nian ba iha kontestu rejional no global.

Horiseik ita hala'o tiha ona Sorumutu Ordináriu da-II Ministru Asuntu Tasi nian, hanesan elemento forte identitáriu, estruktural no estratéjiku ba CPLP. Ita hotu nia rai hanesan Nasaun marítima, ho zona ne'ebé boot no ida idak nia soberania no juridisoens, ita nia dever hodi defende ita nia tasi no proteje rekursus natrais sira ne'ebé sai hanesan parte ita nia riku soin.

Ne'e sai hanesan obrigasaun Estadu ita hotu nian! Prezerva ita nia tasi husi ameasa oin oin ne'ebé mosu ho maneira oin oin, hodi bele esplora sira nia rekursus naturais ne'ebé iha atu nene'e bele kontribui ba bem-estar sosial no ba ekonomia sustentável ita nia povu no ita nia nasaun, sai hanesan kestaun estratéjika no vital ne'ebé sei la hases an husi kestaun Defeza no Seguransa.

Tanba ida ne'e maka, hakarak koalía kona-ba Komponente Defeza CPLP nian hodi dezenvolve Mariña no Guarda Kosteiras Estadu-Membru sira hotu, - iha Timor-Leste Komponente Naval no Polísia Marítima - sai hanesan fundamental ba seguransa marítima no ba protesaun ba rekursu marítimu sira nian.

Ne'e maka krusial tebes atu iha estreita koperasaun entre ita nia paiz sira hotu ba kontribuisaun hodi bele hetan esforsu ba kapasidade tasi nian.

Excelências,

Timor-Leste rekoñeses difikuldade sira ne'ebé kona-ba protesaun tasi nian, liuliu kona-ba kombaté hasoru peska ilegal, kriminalidade transnasionál no tráfikú ilísituu sira. Nune'e, maka ami dezenvolve dilijénsia hodi hari'i Autoridade Marítima hodi hasoru dezafiu sira ne'e, nesésidade no kompromissu ba ami nia rain.

Ami mós rekoñese, nesésidade atu hala'o servisu koperasaun hamutuk ho ami nia parseiru sira, partikular liu ho parseiru rejional sira, kona ba seguransa marítima. Diplomasia marítima sai hanesan komponente importante ba polítika esterna Estadu sira ne'ebé iha Rejiaun Ásia Pasífiku nian, haré ba número boot nasaun marítima sira nian no asosiadu hela nia, riku soin ne'ebé boot no via komunikasaun ne'ebé importante tebes no maka parte iha globo ne'e tomak.

Kona-ba matéria seguransa marítima, Timor-Leste hakarak kontribui ativamente ho nia Forsa sira ba iha seguransa rejional tasi no via komunikasaun sira nian. Kopersaun entre ita nia paiz sira liu husi ita nia Komunidade sai hanesan dalan ida metin liu tan hodi bele reforsa kapasidade komponente Naval F-FDTL nian, hanesan kontributo boot ida hodi bele alkansa

aspirasaun Estadu Timor nian nune'e mós hodi halo realizasaun kompromissu rejional Timor-Leste nian.

Hare ba kestaun seluk ne'ebé la'os tasi nian, hakarak mensiona kona-ba realizasaun ezersísio Felino sai hanesan kontributu boot ida hodi halo di'ak liu tan artikulasaun iha operasaun Forsa Armada Estadu-Membru sira nian, nune mós hodi reforsa liu tan amizade no konfiansa entre país sira CPLP nian.

Modernizasaun no profisionalizaun Forsa sira nian fo ona kontributu ba iha sira nia empenhamentu no kredibilizasaun, iha nível rejional nom mós global, kona-ba misaun assisténsia umanitária no operasaun manutensaun ba paz, ne'eb'e bele sai hanesan ezemplu misaun iha "Líbano no Sudão do Sul".

Tanba sá maka ita sei haré ba ida idak nia aan kona-ba kontestu globalizasaun nian, maka nune'e hakarak refere, tuir prinsípiu solidariedade ne'ebé hakerek ona iha Protokolo Koperasaun CPLP kona-ba Domínio Defesa nian, orientasaun política nesésáriu atu halo reflesaun hodi bele fo resposta kordenada ba iha situasaun katástrofe no emerjénsia, hodi kontribui ba promosaun Direitu Umanu sira nian no ba realizasaun kompromisu estatuário no konstitutivu Komunitade ida ne'e nian.

Exelénsias,

Molok atu fahe malu, hakarak agradese ba ami nia Ministru Defeza, Dr. Cirilo Cristovão, ho responsabilidade ne'ebé maka nia iha hodi simu knar pasta Defeza ami nia Komunitade nian, fiar metin katak nia sei hala'o nafatin ho responsabilidade.

Tanba iha semana ida ne'e nia laran, aban loron 20 fulan Maiu ami komemora tinan 14º Restarasaun Independénsia ami nian, luta ida ne'ebé ami fiar ba iha apoiu inkondisional ami nia povu maun alin CPLP nian – bainhira ami seidauk halo parte ba iha Komunitade ida ne'e – aproveita mós hodi Governu nia naran, konvida Ita Boot sira hotu hamutuk ho ami iha selebrasaun loron ida ne'e, ne'ebé ami orgulla tebe-tebes.

Ikus liu dezeja susesu boot ba iha enkontru ida ne'e, husi ne'e bele hetan proveitu di'ak liu atu nune'e ita hamutuk bele hetan resposta ba dezafiu sira ne'ebé ita hotu nian, maibé balu hanesan boot ba balun no ba seluk lar. Tamba ne'e maka ita hotu CPLP nian!

Bem hajam.

19 maiu 2016

Dr. Rui Maria de Araújo